

新  
元  
史

第五七册

列傳第一百三十五

新元史卷之二百三十八

賜進士出身日講起居注官翰林院侍讀國史館纂修膠州柯劭忞撰

文苑下

薩都刺

周權

陳泰

黃許

楊士弘

萬白  
周貞

辛敬  
鄭大同

史公班

傅若金

李康

迺賢

黃玠

何失

程以臨

王逢

蒲道源

岑安卿

謝宗可  
鄭元祐

胡天游

周霆震

吳定翁

孫轍

郭鉅

舒頤

李祁

王禮

戴良

吳海

王冕

錢惟善

張昱

陶宗儀

顧德輝

郭翼

楊維楨

張憲

張雨

丁鶴年

倪瓚

黃公望  
吳鎮

王蒙

薩都刺字天錫答失蠻氏後徙居河間薩都刺本朱氏子其父養爲己出弱冠成泰定四年進士授應奉翰林

文字擢御史於南臺以彈劾權貴左遷鎮江錄事司達  
魯花赤歷淮西廉訪司經歷至正三年擢江浙行省郎  
中遷江南行臺侍御史明年左遷淮西江北道經歷詩  
才清麗名冠一時虞集雅重之晚年寓居武林每風日  
晴好輒肩一杖挂瓢笠踏芒蹠凡深巖邃壑無不窮其  
幽勝興至則發爲詩歌著有雁門集八卷西湖十景詞  
一卷後入方國珍幕府卒

周權字衡之處州人磊落負雋才持所作走京師袁桷  
大異之謂其意度簡遠議論雄深可預館職力薦弗就  
陳旅選其詩題曰周此山集此山權之別號也歐陽元

序云季世詩人宋之習近骯髒金之習尙號呼當混一之初猶或守其故習今則皆自刮闌而不爲矣此山詩簡淡和平語多奇雋揭傒斯謂詩之正如日月星辰山川草木鳥獸而其變如風雲雷雹龍騰虎躡要在盡其常通其變而已惜不得與權共論之

陳泰字志同茶陵州人延祐初與歐陽元同舉於鄉以天馬賦得薦官龍泉主簿生平以吟咏自怡別號所安有所安遺集一卷好作歌行出語清婉有致

黃許字與可處州人至正中遣大臣宣撫各道許以處士獻採時十策曰嚴選舉革貪污除吏敝抑兼并省冗

官汰僧道覈田賦興武舉作士氣結人心磊落數千言時不能用後中書省參政普顏帖木爾內臺治書侍御史李國鳳奉詔經略江南得許十策嘆曰世未嘗無才顧上無用才之人耳初許及懷玉鄭元善同里葉峴林定老相師友三人皆第進士而許獨不遇定老僉浙東廉訪司事舉爲麗水儒學教諭不就所著有四書會要讀易大意詩書類要天文地志官制類編及古今人詩文駢儻類選有石壁晚稿不爲華靡無益之言學者稱爲南岫先生

楊士弘字伯謙襄陽人好古學嘗選唐詩一千三百四

十首分爲始音正音遺響總名曰唐音其自著有鑒池  
春草集與江西萬白河南辛敬江南周貞鄭大同皆以  
詩雄名聲相埒

史公珽字搢叟明州人精易理作文有典則同里鄭奕  
夫以道學文章自命每有論譏必俟公珽鑑定然後出  
稿隱居數十年助教程端學薦主甬東書院棄去不就  
自號蓬廬處士有蓬廬稿易演義及象數發揮若干卷  
同時陳大倫字彥理諸暨州人始學於從兄洙後事吳  
萊絕意仕進嘗語人曰吾平生無他嗜唯攻文成癖耳  
所著有春秋手鏡尙雅集

傅若金字與礪新喻人少孤刻苦於學能文章受業范  
檉之門甫三十游京師虞集見其詩大稱賞之元統三  
年介使安南乘傳至真定若金始悟曰安南自陳日烜  
絕王封朝廷降詔止稱世子今不然無故王之也還  
白中書更之至安南館姬侍郤之曰吾曹非陶穀曷爲  
以此見汚使還授廣州教授卒有文集二十卷

李康字寧之桐廬人事母篤孝人稱李孝子工詩文旁  
及書畫琴奕無不冠絕一時至正二年郡守馬九臯遣  
使幣聘不起行省官至桐廬命縣令造請議事康不得  
已往極談當時得失欲薦之以母老辭有杜詩補遺桐

川詩派梅月齋永言看山清暇集

迺賢字易之葛邏祿氏世居金山之西後散處內地隨兄璫海宦江浙遂家明州生平不喜祿仕獨長於歌詩不規規雕刻而溫柔敦厚有風人之致每一篇出土大夫輒傳誦之時浙人韓與玉能書王子充善古文人目爲江南三絕至正間用薦爲編修官有金臺集海雲清嘯集行世同時黃玠字伯成定海人幼勵志操卜築弁山號弁山小隱工詩有知非稿唐詩選纂韻錄行世何失昌平人負才氣能詩文至正間名公交薦以親老不就揭傒斯雅重其人贈以句曰心事巢由上文章陶

阮間虞集見其所作嘆曰當序而傳之使後之作者亦知世有斯人後卒於家

程以臨字至可江西寧州人後至元間除將仕郎辭不就天資超悟尤長於詩構別墅閉戶著書老而彌篤選漢魏唐宋諸詩名曰刪後正音其自著有瓢丸小集同時黃庚字星甫天台人著有月屋漫稿其自序曰僕齟齬時習舉子業不暇爲詩自科目廢始得脫屣場屋放浪湖海凡平生豪邁之氣盡發而爲詩若醯雞之出甕天坎蛙之出蹊涔而遊江湖也其詩風致清遠時人重之

王逢字原吉江陰人才氣爽俊以能詩名於時至正中作河清頌臺臣薦之稱疾辭晚年避亂上海烏涇築草堂以居自號最閒園丁又稱席帽山人元亡明太祖徵召甚迫以疾辭逢與戴良皆眷眷有故國之思云有梧溪詩集七卷

蒲道源字得之眉州青神人幼強記過人究心濂洛之學嘗爲郡學正罷歸晚以遺逸徵入翰林改國子博士歲餘引去起提舉陝西儒學不就優游林泉病弗御醫藥飲酒賦詩而逝仲子機爲祕書少監哀其遺文曰間居叢稿二十六卷黃潛爲之序稱其以性理之學爲臺

閣之文云

岑安卿字靜能餘姚人所居近榜栳峯號榜栳山人與李季和危素相善嘗作三哀詩弔宋遺民之在里中者寄託深遠膾炙人口著有榜栳山人集同時謝宗可江甯人有咏物詩百篇傳於世皆婉秀有思致汪澤民題其卷謂綺靡而不傷於華平淡而不流於俗鄭元祐字明德遂昌人兒時以乳媼失手傷右臂比長能左手作楷書規矩備至自號尙左生僑居平江詩名籍甚所著有遂昌山樵雜錄其詩曰僑吳集

胡天游名乘龍以字行別號松竹主人岳州平江人有

俊才七歲能詩具作者風力名動一時然負高氣孤立峻視有沈湘蹈海之概其詩名傲軒吟稿晚歲作述志賦尤爲人所傳誦

周霆震字亨遠安成人父以道篤志古學宋亡遁跡石門霆震績其世學專意古文辭每屬文不起草而用意精刻至正中遭亂其感時觸事之作皆可補國史之未備晚年自號石西子有石初集十卷謂石門吾先志不忘本也

吳定翁字仲谷臨川人工於詩揭溪斯稱其幽茂疏澹可比盧摯辟薦相望終身不出嘗曰士毋求用於世惟

求無愧於世可也同郡孫轍與定翁齊名吳澄序其集曰所謂仁義之言藹如也定翁與轍俱不仕元統二年轍卒年七十三

郭鉅字彥章吉水人壯年負盛氣爲詩清麗有法其於離亂窮愁之作尤悽惋動人年逾六十竟以貧死其春夜詩序云余值時危一貧到骨今春雨雪連旬牛衣以當長夜遂成瘡痏其固窮如此所著靜思集詩文甚富舒頤字道原績溪人年十五六與同郡程文講明經史之學後至元中辟貴池教諭秩滿轉台州學正遭逢世亂奉親歸遁山中嘗避寇巖谷被執頤正色叱賊賊感

而釋之其詩盤鬱蒼古不染纖巧織紅之習書法尤樸拙識者以爲得漢隸法學者稱貞素先生有華陽貞素齋集七卷

李祁字一初茶陵州人元統初登進士第一應奉翰林文字母老就養江南改婺源州同知以母憂歸隱永新山中年七十餘遭兵亂被傷而歿總制新安余茂刻其遺文爲雲陽先生集十卷同舉進士者王禮字子讓廬陵人元亡不仕日以鐵拄杖採詩山谷間著作甚富不求聞於時故所傳絕少

戴良字叔能婺州浦江人少事舉子業尋棄去專心博

古學文於柳貫黃潛學詩於余闕皆得其師承至正中  
以薦授江北儒學提舉而浙東已陷乃避地吳中久之  
挈家泛東海渡黑水洋憩登萊間僑寓昌樂數載訪求  
齊魯間豪傑奮欲有爲而卒無所遇後南還變姓名隱  
九靈山下明太祖徵之召見頗忤旨卒於邸舍有九靈  
山人集三十卷又有吳海字魯客閩縣人至正末絕意  
仕進以文學自娛與同鄉王翰友善翰事見忠義傳翰  
之死海實勸之又撫其子偁俾成立時論稱之爲文嚴  
整典雅有聞過齋集八卷

王冕字元章號煮石山農諸暨田家子也年八歲父命

牧牛隴上竊入學舍聽諸生誦書聽已輒默記暮歸亡牛父撻之已復如故安陽韓性聞而異之因錄爲弟子通春秋諸傳一試不第卽焚所爲文常着高簷帽披綠蓑衣履長齒木屐或騎黃牛持漢書朗誦人皆目爲狂北遊燕有欲薦以官職者冕曰不滿十年此中狐兔穴矣何以祿爲卽遁歸隱九里山結茅三間自題爲梅花屋主倣周禮著書一卷坐卧自隨賦詩千百言立就善畫梅題詩其上人爭寶之明太祖聞其名召爲參軍未就而卒

錢惟善字思復錢塘人長於毛詩學鄉試題爲羅刹江